

ICONLEE 2017: Gabungkan kerja lapangan dan teori

December 14,2017

OLEH SABIRAH AZIZ (<https://selangorkini.my/2017/12/iconlee-2017-gabungkan-kerja-lapangan-dan-teori/>)

SHAH ALAM, 14 DIS: Persidangan Antarabangsa dalam Undang-Undang, Ekonomi dan Pendidikan (ICONLEE) 2017 yang memasuki kali kedua penganjurannya menyaksikan peserta menggabungkan kerja lapangan dan teori, pada masa sama.

Pegawai Dasar Agama kepada Dato' Menteri Besar Selangor, Prof Madya Dr Muhammad Nur Manutu berkata, melalui gabungan secara teori dan amali, ia dapat mendisiplinkan peserta terutama golongan pelajar.

“Melalui persidangan ini, saya lihat peserta turun padang membuat kerja di lapangan, maka tradisi ini patut dihidupkan.

“Selain itu, persidangan ini akan mencambahkan pemikiran dalam wacana serta diadakan tepat pada masanya, selari dengan perkembangan ilmu pada masa kini.

“Dalam persidangan ini, peserta juga dapat melihat empat sesi pembentangan kertas kerja dan sorotan ilmiah dalam pelbagai topik serta isu berkaitan syariah, perundangan Islam, pelaburan juga perbankan,” katanya.

Beliau berkata demikian ketika berucap mewakili Dato' Menteri Besar, Dato' Seri Mohamed Azmin Ali dalam majlis perasmian persidangan berkenaan, di Hotel Grand Bluewave, di sini, semalam.

Katanya, pembentangan itu bertujuan memperkasakan peranan perundangan, ekonomi dan pendidikan dalam pembangunan ummah, di peringkat tempatan dan antarabangsa.

Pada masa sama, ia dapat mengenal pasti isu-isu berkaitan secara teori dan praktikal serta mengemukakan penyelesaian terhadap isu terbabit.

Persidangan bermula pada 13 dan 14 Disember lalu bertemakan “Towards Promoting Sustainable Development Through Strengthening the Role of Asean International Cooperation” adalah anjuran Fakulti Syariah Undang-Undang, Fakulti Pendidikan , Fakulti Pengurusan dan Muamalah dari Kolej Universiti Islam Antarabangsa Selangor (KUIS) dengan kerjasama Universitas Muhammadiyah Metro Lampung, Indonesia.